



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

## 1. Kalenderwoche – ab 02. Januar 2011

### Wemmor so zurigg guggn dud...

Nee, irschendwie dun de Jahre jeds Jahr rumgehn un de Menschheid is widdor e bißl doofor gewordn! Odor dun Sie irschendwo een Zibbl von Vornunfd sähn? Jedor dud bloß immor grade bis zu seim eischnen Dellorrand guggn. Un die, die ma bißl iebor dähn Dellorrand nausguggn dun, die wern nisch geheerd. Zum Beischbiel ooch dor Ohbahma! Guhd, dähr is nu villeischd nisch grade e neuor Heilsbringor, wie das ma dor alde Jesus gewähsn is... - wemmor das alles gloom kann, was da so in dor Biebl schdehn dud! - ...abor dor Ohbahma had doch werglisch e baar ganz vorninfdische Sachn machn wolln. Das mid dor Kranknvorsischorung odor midm Kriesch un so. Un weil nu in de USA sisch die aldn Schdarrköbbe gwähr geleeschd ham geeschn de Vornunfd, da duds jedzde heeßn, dor Ohbahma is e erforschlosor Bressidend. Ja, dun se doch ma in dor Zeidung lähsn! Da wird nisch iebor die Schdarrköbbe vom Finanzgabidahl gemeggord, nee, ieborn Ohbahma. Keene Mährheidn.. Fiehrungsschwäsche... muss wahrscheinlich bald abdankn... un so die Deehne! Schdadds Unnorschdidzung un Beschdärgung gibds hämisches Grinsn!

Nee, ährlisch - wenn dor Jesus iebors Wassor loofn konnde... - eenor dähr in de Weld Vornunfd neinbring will, dähr muss daderbei ooch noch Fligg-Flagg un Saldos machn kenn!

Off dor annorn Seide leefd so e Rindvieh wie dähr Sarraziehn in Deuschland rum - ooch in Gemnidz! - un lässd sisch bewundorn. De Dorgschohs im Fernsähn dun sisch um dähn reißen, de Bildzeidung had dähm de Schdeischbieschl gehaldn... un nu wird dähr mid dähm Bleedsinn, dähn dähr vorzabbd had, ooch noch reisch! Un alles leefd unnor dähm Mändlschn von Meinungsfreiheid! Ja, wenn du eene Meinung hassd, die beschdimmdn Leidn in dähn Schdreifn bassd, dann hasde de Freiheit. Wenn de eene Meinung hasd, die nisch bassn dud... - ehm so beschdimmdn Leidn nisch! -

dann dud dir de Freiheit nischd nidzn. Mor kann werglisch dodahl frei was meen, aber ob das, was mor meend, ooch zu heern is, das is e ganz annersch Gabiddl!

Un warum nu grade de Meinung vom Sarrazieln so laud nausbossaund wordn is... - dscha, da muss es also viele gähm, die ooch so was meen wie dähr. Daderbei duds werglisch so viele schlaue Leide gähm in Deuschland, die schlaue Sachn meen dun, aber die Bieschor von die, die komm nisch in de Besdsellorlisdn - ehor in Reißwolf, wenn se nach zwee Jahre immor noch in de Regahle rumschdehn dun. Nee, de freie Meinung nidzd gahr nischd, du mussd die Meinung ham, die geheerd wern will - die eene Mährheid grischn kann! Ja, de Mährheid is dor Dohd dor Vornunfd.

Nee, werglisch, wemmor das ma so bedenkn dud, da kenn eim de Bolldediggor eschd leid dun. Also, die, die nisch bloß off Diäd sinn! Isch meene, die, die wo noch was beweeschn wolln in dor Gesellschaft... - die solls noch gähm! - ... die missn doch vorzweifln! Ohne Mährheid kennse nischd ausrischdn! Isch kann da de Angela vorschdehn, wenn die nischd machn dud. Eenfach erschdema guggn un Gras wachsn lassn. Dann schnubborn, wohähr dor Wind wehn dud. Währ zu frieh sachn dud, wassor meend, dähn beschdrafd de Mährheid!

**Eduard Sachsenmeyer**